

Edición Special
DIARIO

Himno y Bandera

18 MAART 2001

Nos historia

Juan Enrique Irausquin ta "Motor di e economia Arubano y tata di nos turismo"



Na apertura di Aruba Caribbean Hotel na 1959.

ORANJESTAD (AAN): Ata aki un tiki di historia di Aruba, suministra pa Partido PPA.

Juan Enrique Irausquin a nace na Aruba, dia 3 di december 1904. Despues di Lagere School na Aruba el a bay Curaçao na unda el a sigui diferente curso den educacion comercial y tambe den accounting, money and Banking. Na edad di 14 aña el a drenta

servicio di Hollandsche Bank y den un tempo relativamente cortico a yega na e posicion di procuratiehouder. Impulsa pa un ambicion di superacion, sr. Irausquin na 1929 a tuma retiro for di Hollandsche Bank y a drenta servicio di firma John Gerard Eman, cu durante algun tempo tabata haci negoshi bancario. Na 1936 e Firma John Gerard Eman den cooperacion

cu Maduro & Curiels Bank NV a dicidi di funda e prome banco Aruban, esta Aruba Bank N.V., Juancho, manera popularmente e tabata worde yama, a bira su Director. Posicion cu el a ocupa te na aña 1951.

Sr. Juan E. Irausquin tabata hopi activo riba hopi tereno. E tabata presidente di Camara di Comercio, di Comisson di Turismo y miembro di hopi comision economico, co-fundador di Rotary Club y Home Building Foundation na Aruba. Na 1947 el a bira miembro di Staten y despues a sali re-elegi den tur eleccion na cual el a tuma parti.

Naturalmente despues di 1949 esaki tabata cu e partido cu el a funda, esta Partido Patriotico Arubano. Varios biaha el a worde nombra Presidente di Staten den reconocimiento pa su capacidnan parlamentario.

For di aña 1948 Juancho a participa na tur conferencia importante tocante autonomia pa

Antillas Neerlandes, manera Ronde Tafel Conferentie, y e asina yama Kleine Commissie. Na 1949 Juan Enrique Irausquin a funda Partido Patriotico Arubano (PPA).

Den e promer eleccion pa Eilandsraad na Aruba, Juancho a sali elegi, kedando miembro di e raad aki pa varios aña. Su partido a keda den oposicion te na aña 1954. Dia 1 di april 1956 Juan Enrique Irausquin a worde nombra Ministro di Finanzas y Fomento, puesto importante cu el a keda ocupa te na su morto riba 20 di juni 1962. Juancho tabata casa cu Maria Waitzberg.

Den reconocimiento pa su hopi meritonan riba tereno politico, economico y social. Su Mahestad La Reina Juliana a hana bon di nombre Officier den Orde di Oranje Nassau. Aruba y Antiyas Neerlandes en general a honra memoria di e ilustre Arubano inaugurando un estatus riba e pleintji dilanti Postkantoor y horando e cu su number "Juan Enrique Irausquinplein". Gobierno di Aruba a duna e caya cual el a construi y tabata e infraestructura necesario pa e construccion di Hotelnan su number na 1992. Vliegfeld di Saba y un caya riba St. Maarten tambe ta

carga su number como reconocimiento di su contribucion na nan desaroyo y progreso. Servicio Postal di Aruba riba 1 di januari 1996 a sa di honra su memoria cu un stampia special na balor di 100 cent.

Durante e celebracion di e dia Nacional di Pais Aruba, nos ta sintiele como nos deber di recorda e contribucion enorme cu e ilustre figura aki a hunga durante su bida den e historia politico Arubano. Fundador di P.P.A., Motor tras di economia Antiyano y Arubano, Tata di e turismo Arubano. Nos kier acentua cu e motibonan di Juan E. Irausquin q.e.p.d. pa funda P.P.A. Tabata hustamente e principianan sagrado di un Arubano cu ta stima su isla y no e deseo pa esaki bay cai mas profundo den colonialismo cu ya caba e tabata meti.

Historia ta dicta cu na momento cu tabata cu kier a humilia Aruba, cu caracter el a sali na defensa di su isla y a propina nan un golpi. Su number, labor, actitud, caracter, su sentimentonan pa problemanan di e ser humano den comunidad, tur esaki y mucho mas a hibe den tur skinda di Aruba.